

LUMNEZIA



La Casa d'Angel muossa in'exposizion collectiva cun lavour da varga 40 persunas.

FOTO AUGUSTIN BEELI



Ils tschun cumpogns sursilvans, da sen. Fabian Sgier, Samy Schmid, Armin Candrian, Remo Derungs ed Andri Arpagaus.

FOTOS AUGUSTIN BEELI

«OVRAS» ella Casa d'Angel

La Fundaziun da cultura Lumnezia envida questa stad per l'otgavla gada ad ina esposiziun gronda. Quella sede dichescha ad art ed artisanadi indigen dalla Lumnezia e Val S. Pieder. Ellas localitads dalla Casa d'Angel a Lumbrein astg'ins admirar exponats da varga 40 persunas.

La Casa d'Angel a Lumbrein ei sesviluppada dapi gl'onn 2015 sco center lumnezian d'art e cultura. Las differentas exposiziuns dapi la stad 2015 han giu gronds resuns e dattan perdetga d'ina vitalitat en quei secur. L'exposiziun dil luf ha tratg l'attenziun nazionala, aunc avon l'exposiziun dalla crappa, l'emprema gada quella culs maletgts ord la collecziun dalla fundaziun Capauliana. Per tuttas exposiziuns ha la menadra dalla Casa d'Angel, *Anne-Louise Joël*, astgau collaborar cun curaturs e curaturas hospitontas da renun. *Nicole Seeger* dil Museum d'art dil Grischun, *Beat Gugger* ha concepiu l'exposiziun «Passadis», *Hans Ruedi Fricker* quella dalla crappa, *Chantal Störmer*, quella cul num «midadas/Wandel».

La davosa curatura hospitonta, *Renate Lutz*, ha dau vinavon la bitgetta a *Susanne Kudorfer*. Quella ha concepiu l'exposiziun ch'entscheiva dumengia proxima. Il tetel ei «OVRAS – Werke aus Vals und Lumnezia». Sco quei che la Fundaziun da cultura Lumnezia e la Casa d'Angel scrivan en lur comunicaziun, se-tracta ei d'ina vasta schelta dad ovras creativas e portrets da persunas che han ina relaziun culla Val S. Pieder e la Lumnezia. Quellas han construui, surcusiu, entagliau, malegiu, designau, cantau, fatg caltschiel, flertru, filmau ni fotografau. Lavurs tradizionalas ed ovras dad amaturas ed amatars semischeidan cun ovras d'artistas ed artists professionalis. Ellas stanzas dalla Casa d'Angel ha la curatura saviu concepir in'exposiziun representativa. Susanne Kudorfer ha integraru lavurs dallas suandontas persunas: *Cornelia Arpagaus, Roman Blumenthal, Bettina Brunold, Donat Caduff, Guido Caminada, Gion Giusep Capaul, Sandra Capaul, Onn'Urschla Capaul-Caminada, Carmelia Casanova, Robert Cavegn, Sarah Clavadescher, Barla Coluccello, Daniela Demarmels-Caduff, Erwin Derungs, Mathias Derungs, Serafin Derungs, Dominic Flepp, Corsin Fontana, Sonia Fontana, Egmont Heisch, Yvonne Mayer-Capaul, Margreta Riedi, Rita Riedi, Noemie Saland, Mieke van Santen, Claudia Schmid, Gion Antoni Sgier, Martin Solér & Roswitha Lüthi, Mengia-Barla Solér, Verner Solér, Ingrid Soller, Sandro Livio Straube, Bibi Vaplan, Imelda Vieili-Candinas, Lukrezia Walker, Pius Walker, Monika Wasescha, Markus Weggenmann, Beate Westdickenberg, Pia Wirth-Caminada, Olivia Wolf.* (fmr/abc)

L'avertura dall'exposiziun ei dumengia, ils 3 da fenadur 2022, allas 10.00 – 17.00. La casa d'Angel ei aviaria mintgamai mardis, gievgia e sonda, dallas 14.30-17.30. Ulteriuras informaziuns mira www.casadangel.ch

Mintga meins ina surpresa

Sin plaun naziunal ein els enconuschents cun lur song «147 Täg». Varga 1000 fans teidlan mintga gi quel sillia app da Spotify. Igl ei denton buca tut quei che la band NoFuture porscha. Il project actual cuoza in entir onn e punct culminont ei gl'avrel 2023.

AUGUSTIN BEELI/FMR

Lur song dalla Henrietta ei cumparius il 2011. Igl ei la canzun romontscha da No Future, ella s'auda tier gl'album «il mument». Henrietta ei in longseller che biars enconuschan. Aunc pli enconuschents ei il tetel «147 Täg». Quasi mintgin che fa militer en Sviza enconuscha il «hinni» dils recruit ch'ein sfurzai da far militer. 147 ei l'ovra da No Future, e quei ein il fundatur, cantadur e gitarist *Samy Schmid* ed *Armin Candrian* il responsabel dalla «cuschina», la batteria dalla band. *Fabian Sgier* da Sevgein, il posauant e keyboarder, ed *Andri Arpagaus* da Ladir che suna il bass cumpletestan il quartet.

Exercitar sin distanza

La band exista dapi 2001, lu ha ella retschiert il num «No Future». Quei ch'il num sugeresa chei buca schabegiau! Il zercladur 2022 eis ella aunc adina cheu. No Future datti vinavon, la band ha effectivamein in futur. Con gitg, laian els aviert. «Schi gitg che nus havein plascher da far musica ensemble», manegia Armin Candrian. El e ses treis cumpogns ein motivai, els s'entaupan duas gadas ad jamna per exercitar en lur local ella zona d'industria a Glion. Andri Arpagaus e Fabian Sgier san buca esser dalla partida mintga gada, omisdus ein secasai giu la Bassa, Andri a Schaffusa, Fabian a Thun.

All'entschatta sunava No Future – sco bia-ras autres – in stil diraglia, ina mischeda da ska-punk, reggae e crossover. El decuor dils onns ein els vegni – sco in bien caschiel ni in bien vin – pli madirs. Ils songs paran propi buca mo tocanags explosivs. Ch'ils quater cumpogns san far musica ensemble, malgrad la dis-tanza, ei dil reminent negin problem. La digitalisaziun lubeschia quei. Pigl album niev ha la band gudignau Remo Derungs sco tschunavel commember. El contribuescha culla trumpet-



La band en aczun, sin tribuna a Flem.

ta e dat cheutras sia atgna nota alla musica d'in stil semegliont al funk. Pils texts en engles e tudestg grischun ei Samy Schmid responsabels. Il cantadur e gitarist ei creativs. Quei han ins udui ed encurschi sonda a caschun dil concert el center da sport Prau la Selva.

Actualmein ei la band occupada cun in project innovativ. No Future ha registrau siu quart album cul tetel «XII». Ils 12 tetels presenta la band denton mo cun 12 buccadas. La cefra ro-mana XII ha in motiv. «Mintga meins presentein nus ina canzun nova, gl'avrel 2023 vegnин nus lu a battegiar gl'entir album», declara il batterist Armin Candrian.

Ins capeschia mintga plaid

Gl'emprem tetel digl album niev han els pubblicau ils 20 da matg 2022. Il song senumna «Nüm Allai» ed ha connex cull'energia positiva che la band vul derasar. «Nossa societat ei confrontada cun bia negativ e dramas. Perquei vulein nus rumper e dar empau glisch en quei temps», declara Samy Schmid. Ils 17 da zercladur ei il se-

cund song «Numumanand» cumparius. Quel serefereschia al survetsch militer ed al song da success «147». Melodia e text domineschan, buca exnum il ritmus. Ins capeschia mintga plaid. Ins savess compareglier il stil cun quel da 77 Bombay Street. Culla differenza ch'ils texts ein tutt en dialect tudestg grischun. Dat ei er in tetel ro-montsch? «Samy Schmid ei gl'autur dils texts, e si lungat mumma ei il tudestg», ei la risposta.

Gl'album sedistinguia cun ina specialitat: «Mintgin dils 12 songs cuntengn stuors», explicchescha Armin Candrian. Fabian Sgier suna la posaua, e Remo Derungs, il commember hospitont, la trumpetta. Remo Derungs ha era sunau silla tribuna el Prau la Selva a Flem. El ha fatg endament il virtuos trumpettist american Louis Armstrong. Tgei surpresa astg'ins spittgar ils 16 ni 17 da fenadur cul tierz song? Ils tschun cumpogns sursilvans tradeschan nuot. Gl'album ha No Future dil reminent produciu egl enconuschen studio da musica Pow-erplay a Turitig.

Dapli informaziuns: www.nofuture.ch.

Clubs da golf han concurrenzau a Selva

Il Club da golf Sedrun ha organisau in campionadi dils clubs da golf dalla Surselva ed eruiu ils campions ord il miez dallas commembras e dils commembers.

PAUL DUFF/FMR

La sonda targada han ils golfists e las gol-fistas dalla Surselva gudu in di bialaura cun dar golf e tgirar la cumpagnia den-ter las commembras ed ils commembers dils treis clubs da golf da Sedrun, Breil e Sagogn. La plievgia ed il sulegl cauld dil davos temps han procurau ch'ils irals dal-las plazzas da golf ein verds sco aunc mai. Las pintgas ruosnas, ellas quallass las bal-las ston setschentiar, ein denton dapertut tuttina e la finamira da giugaduras e giugadurs ei da duvrar aschi paucas fridas sco pusseivel per ruclar la balla en ruosna.

Sport da generaziuns

A Sedrun ei il giuven giugadur da 14 onns semesiraus cul golfist da 80 onns Els

han giugau sil medem nivel, quei entras il sistem da handicap che dat a mintgin la schanza per in bien resultat da giug. Tier las damas ei il nivel da vegliadetgna staus pli ulivaus. Il giug pretenda ina bu-na fisica ed igl inschign da gartegiar exact la balla cul fest. Inagada sto la balla sgu-lar aschi lunsch sco pusseivel. L'autra ga-dato sto ella setschentiar aschi maneivel sper la bandiera dalla ruosna e per finir sto el-la ruclar exact ella ruosna cun in radius da 15 cm. La teoria tuna fetg sempla, mo il giug sa esser maligns e muenter emozions. Sper la buna fisica ei pia era la fermezia mentala necessaria per giugar golf. Per tuttas e tuts valan reglas da giug e da fairness, las qualas ein definidas tenor de-terminaziuns dil pli vegli club da golf da-sant Adrews en Scozia.

Rangaziun

Umens brutto: Götz Patrick, Sedrun, 28; Quinter Alfons, Sedrun, 25; Sestito Pino, Breil, 25. Damas brutto: Cathomen Isabella, Breil, 19; Beer Romy, Sedrun, 15; Verner Cathomas Anne, Sedrun, 14. Umens netto: Quinter Alfons, Sedrun, 45; Tuor Al-do, Sedrun, 36; Sestito Pino, Breil, 34. Damas netto: Cathomen Isabella, Breil, 35; Käibling Rosmarie, Breil, 32; Caduff Lisabet, Sagogn, 31.



Victuras e victurs dalla Surselva Golftrophy a Sedrun survegnan bials premis ed ein sa-tisfatgs.

FOTO PAUL DUFF